



Na osnovu člana 22 Statuta Brčko distrikta Bosne i Hercegovine - prečišćeni tekst (Službeni glasnik Brčko distrikta BiH, broj 2/10), Skupština Brčko distrikta Bosne i Hercegovine, na 47. redovnoj sjednici održanoj 15. juna 2011. godine, usvaja

**ZAKON
O IZMJENAMA I DOPUNAMA ZAKONA O ZAŠTITI OD POŽARA
BRČKO DISTRIKTA BiH**

Član 1

U Zakonu o zaštiti od požara Brčko distrikta BiH (Službeni glasnik Brčko distrikta BiH, brojevi 9/06 i 19/07) član 5 mijenja se i glasi:

**„Član 5
(Nadležnosti Vlade Brčko distrikta BiH)**

Vlada Brčko distrikta BiH nadležna je da:

- a) organizuje zaštitu od požara za područje Brčko distrikta BiH;
- b) brine o uspješnom provođenju i preduzimanju mjera za unapređenje zaštite od požara;
- c) na prijedlog odjeljenja nadležnog za poslove zaštite od požara i Inspektorata, donosi godišnji program aktivnosti provođenja posebnih mjera zaštite od požara od interesa za Brčko distrikt BiH.“

Član 2

U članu 7 stav 2 mijenja se i glasi:

„(2) Metodologija za izradu plana zaštite od požara u skladu sa stavom 1 ovog člana utvrđuje se pravilnikom koji donosi šef odjeljenja nadležnog za poslove zaštite od požara uz prethodno dobijeno mišljenje inspektora za zaštitu od požara u Brčko distriktu BiH.“

Član 3

U članu 8 stavovi 2, 3, 4 i 5 mijenjaju se i glase:

„(2) Šef odjeljenja nadležnog za poslove zaštite od požara dužan je, u roku od jedne godine od donošenja plana zaštite od požara u Brčko distriktu BiH, da donese pravilnik o uslovima, osnovima i mjerilima za razvrstavanje preduzeća, drugih pravnih lica i organa javne uprave u odgovarajuću kategoriju ugroženosti od požara.

(3) Šef odjeljenja nadležnog za poslove zaštite od požara dužan je da, u roku od dvije godine od dana donošenja pravilnika iz stava 2 ovog člana, donese odluku o razvrstavanju preduzeća, drugih pravnih lica i organa javne uprave u odgovarajuću kategoriju ugroženosti od požara.

(4) Za obavljanje poslova iz stava 3 ovog člana šef odjeljenja nadležnog za poslove zaštite od požara u skladu s važećim propisima može da angažuje:

- a) stručno i ovlašteno preduzeće ili drugo pravno lice;
- b) stručnog konsultanta.

(5) Izuzetno, šef odjeljenja nadležnog za poslove zaštite od požara može odrediti da preduzeće, drugo pravno lice i organ javne uprave budu razvrstani u neposredno višu kategoriju ugroženosti od požara, imajući u vidu privredni, historijski, kulturni i drugi značaj djelatnosti koju obavlja.“

Član 4

U članu 9 stav 5 mijenja se i glasi:

„(5) Opći akt o zaštiti od požara donose:

- a) preduzeće i drugo pravno lice;
- b) preduzetnik;
- c) organ javne uprave Brčko distrikta BiH ili organizacioni dio organa javne uprave;
- d) pravosuđe Brčko distrikta BiH;
- e) Pravobranilaštvo Brčko distrikta BiH;
- f) Policija Brčko distrikta BiH.“

Stav 6 ovog člana se briše.

Član 5

Iza člana 9 dodaje se novi član 9a koji glasi:

„Član 9a

(Uslovi za radnika koji obavlja poslove zaštite od požara)

(1) Broj, stručnu spremu i stručne ispite koje su dužni da imaju radnici koji rade na organizovanju i provođenju preventivnih mjera zaštite od požara u skladu s članom 9 stavovima 1, 2, 3 i 4 ovog zakona, utvrđuju se pravilnikom koji donosi šef odjeljenja nadležnog za poslove zaštite od požara.

(2) Program i način polaganja stručnog ispita za radnike koji obavljaju poslove zaštite od požara utvrđuju se pravilnikom koji donosi šef odjeljenja nadležnog za poslove zaštite od požara.“

Član 6

Član 16 mijenja se i glasi:

„Član 16

(Saglasnost na mjere i normative zaštite)

(1) Odobrenje za građenje objekta izdaje se kada se za projektnu dokumentaciju dobije pismeno mišljenje revidenta o primjeni mjera i normativa zaštite od požara predviđenih u tehničkoj dokumentaciji ili stručna ocjena o primjeni mjera, normativa, standarda i drugih propisa iz oblasti zaštite od požara predviđenih u tehničkoj dokumentaciji koju je izradilo ovlašteno pravno lice.

(2) Mišljenje iz stava 1 ovog člana može izdati drugo pravno lice koje radi reviziju tehničke dokumentacije i koje ispunjava uslove propisane Zakonom o prostornom planiranju i građenju.

(3) Pismeno mišljenje ili stručnu ocjenu iz stava 1 ovog člana može izraditi lice koje je u stalnom radnom odnosu u preduzeću ili drugom pravnom licu koje radi reviziju tehničke dokumentacije i:

a) koje ima:

- 1) sedmi stepen stručne spreme iz zaštite od požara;
- 2) najmanje pet godina radnog iskustva u struci;
- 3) položen stručni ispit za projektovanje zaštite od požara; ili

b) koje ima:

- 1) sedmi stepen stručne spreme iz građevinske, arhitektonske, tehnološke, sigurnosne, zaštite na radu, mašinske, elektro i druge tehničke struke;
- 2) najmanje sedam godina radnog iskustva u struci;
- 3) položen stručni ispit za projektovanje zaštite od požara.

(4) Mišljenje iz stava 1 ovog člana je potrebno za sve objekte izuzev za:

- a) individualnu stambenu izgradnju;
- b) objekat koji se koristi za povremeni boravak i odmor u individualnoj izgradnji;
- c) otvoren sportski teren;
- d) dječje igralište.

(5) Mišljenje iz stava 1 ovog člana sastavni je dio tehničke dokumentacije.

(6) Pravno lice koje je dalo mišljenje iz stava 1 ovog člana preuzima odgovornost za projektovane mjere i normative zaštite od požara u tehničkoj dokumentaciji za izdata mišljenja.

(7) Stručnu ocjenu iz stava 1 ovog člana obavezno je pribaviti za:

- a) industrijski objekat;
- b) javni objekat najmanje spratnosti P+1 (prizemlje + sprat) u kojem se okuplja ili boravi više od 100 ljudi kao što su škola, bolnica, sportski objekat, pozorište, kino sala;
- c) visoki objekat;
- d) objekat za proizvodnju i skladištenje eksplozivnih materija;
- e) objekat u kojem se skladište zapaljive tečnosti i plinovi i druge opasne materije;
- f) plinovod;
- g) naftovod.“

Član 7

Član 17 mijenja se i glasi:

„Član 17 (Izrada tehničke dokumentacije)

(1) Preduzeće i drugo pravno lice koje je ovlašteno za izradu tehničke dokumentacije dužno je u projektnu dokumentaciju ugraditi propisane mjere zaštite od požara.

(2) Mjere za zaštitu od požara u tehničkoj dokumentaciji mogu biti integrisane u projekt kao:

- a) elaborat zaštite od požara ili
- b) zaseban projekt u okviru tehničke dokumentacije.

(3) Elaborat zaštite od požara precizno definiše:

- a) sve opasnosti za nastajanje požara koje se mogu pojaviti pri izgradnji i korištenju objekta,

i

b) mjere zaštite od požara koje su predviđene u tehničkoj dokumentaciji.

(4) Zaseban projekt zaštite od požara i elaborat zaštite od požara iz stava 2 ovog člana obavezno sadrže:

- a) procjenu opasnosti od požara s obzirom na dispoziciju i namjenu objekta, građevinske i tehničko-tehnološke karakteristike;
- b) izbor tehničkih rješenja, tehnoloških, elektro, mašinskih, građevinskih i drugih mjera u funkciji zaštite od požara;
- c) izbor mjera zaštite od požara, tehničkih rješenja i građevinskih materijala u funkciji evakuacije i spašavanja ljudi s opisom i uputstvima za postupak evakuacije;
- d) proračun i izbor tehničke opreme i sredstava za gašenje požara i druge mjere u funkciji gašenja požara koje se odnose na osiguravanje adekvatnih puteva, prolaza, prilaza, snabdijevanje vodom i slično;
- e) grafičke prikaze, proračune i tekstualne opise;
- f) opis organizacije posla i potrebna uputstva u vezi s primijenjenim mjerama zaštite od požara;
- g) popis primijenjenih propisa, standarda i normativa, priznatih i dokumentovanih pravila tehničke prakse u svijetu koja nisu regulisana našim propisima.

(5) Elaborat zaštite od požara izrađuje se za svaki objekat ili dio objekta ili za instalaciju koja je predmet projektovanja i sadrži ispravu odgovornog projektanta.

(6) Zaseban projekat u okviru tehničke dokumentacije iz stavova 2 i 4 ovog člana radi se za objekte iz člana 16 stava 7 ovog zakona.

(7) Projektant iz stava 5 i 6 ovog člana dužan je uz projekt dati pisanu ispravu kojom dokazuje da je projektovanje objekta, odnosno tehničko-tehnološkog procesa izvršeno u skladu sa zakonom, propisima i normativima donesenim na osnovu zakona.

(8) Ako u izradi tehničke dokumentacije učestvuju više pravnih lica, investitor je dužan osigurati jedinstvenu izjavu iz stava 7 ovog člana.

(9) Projektant može biti lice koje je u stalnom radnom odnosu u pravnom licu koje radi tehničku dokumentaciju i:

a) za poslove iz stava 5 ovog člana koje ima:

- 1) šesti stepen stručne spreme zaštite od požara;
- 2) najmanje pet godina radnog iskustva u struci;
- 3) položen stručni ispit za projektovanje zaštite od požara.

b) za poslove iz stavova 5 i 6 ovog člana koje ima:

- 1) sedmi stepen stručne spreme zaštite od požara;
- 2) najmanje dvije godine radnog iskustva u struci;
- 3) položen stručni ispit za projektovanje zaštite od požara.

c) za poslove iz stavova 5 i 6 ovog člana koje ima:

- 1) sedmi stepen stručne spreme iz građevinske, arhitektonske, tehnološke, sigurnosne, zaštite na radu, mašinske, elektro i druge tehničke struke;
- 2) najmanje pet godina radnog iskustva u struci;
- 3) položen stručni ispit za projektovanje zaštite od požara.

(10) Da bi se fizičko lice bavilo projektovanjem zaštite od požara, pored uslova iz stava 9 ovog člana, dužno je da ima licencu koju izdaje odjeljenje nadležno za poslove zaštite od požara u skladu s pravilnikom iz stava 12 ovog člana.

(11) Pravno lice koje radi tehničku dokumentaciju, a za izradu elaborata zaštite od požara nema zaposleno lice koje ispunjava uslove iz stavova 9 i 10 ovog člana, zaključuje ugovor s preduzećem i drugim pravnim licem koje te uslove ispunjava za izradu priloga zaštite od požara u projektnoj dokumentaciji.

(12) Program i način polaganja ispita za projektovanje zaštite od požara utvrđuje se pravilnikom koji donosi šef odjeljenja nadležnog za poslove zaštite od požara.“

Član 8

Član 19 se briše, a dosadašnji članovi 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 44, 45, 46, 47, 48, 49 i 50 postaju članovi 19, 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 44, 45, 46, 47, 48 i 49.

Član 9

U novom članu 23 iza stava 1 dodaju se novi stavovi 2 i 3 koji glase:

„(2) Pravno lice koje upravlja vodosnabdijevanjem Brčko distrikta BiH dužno je:

- a) održavati pritisak i protok u vanjskoj hidrantskoj mreži u skladu s pravilnikom iz člana 99 tačke gg) ovog zakona;
- b) osigurati katastar podzemnih instalacija i hidranata;
- c) osigurati održavanje hidrantske mreže;
- d) osigurati ispitivanje hidrantske mreže.

(3) Sve neispravnosti na hidrantskoj mreži lice iz stava 2 ovog člana dužno je da prijavi Profesionalnoj vatrogasnoj jedinici Brčko distrikta BiH.“

Član 10

U novom članu 26 stav 2 mijenja se i glasi:

„(2) U objektima u kojima prijete opasnost od izbijanja ili širenja požara, s obzirom na prirodu posla koji se u njima obavlja, moraju se preduzeti propisane ili od inspektora za zaštitu od požara naložene mjere zaštite od požara.“

U stavu 3 riječi: "dežurstvima iz stava 1 i stava 2" zamjenjuju se riječima: "dežurstvom iz stava 1".

Iza stava 3 dodaju se novi stavovi 4, 5, 6 i 7 koji glase:

„(4) Organizator skupa iz stava 1 ovog člana dužan je da osigura plan zaštite od požara, na osnovu izvršene procjene požarne opasnosti, kojim se, pored ostalih mjera, precizno određuje broj ljudi, broj i vrsta vatrogasne opreme koja se mora osigurati u toku dežurstva.

(5) Plan iz stava 4 ovog člana može da radi lice koje ima položen stručni ispit za rad na poslovima zaštite od požara.

(6) Za vatrogasno dežurstvo iz stavova 1 i 3 ovog člana može da se angažuje i drugo pravno lice registrovano za obavljanje ove djelatnosti.

(7) Policija Brčko distrikta BiH može da zabrani održavanje skupa ukoliko nisu ispoštovane odredbe stavova 1, 3 i 4 ovog člana.“

Član 11

U novom članu 28 stavovi 2, 3 i 4 mijenjaju se i glase:

„(2) Kontrolu ispravnosti i ispitivanje aparata iz stava 1 ovog člana, koji se nalaze u prometu i upotrebi, može da vrši preduzeće i drugo pravno lice i preduzetnik koji je registrovan za tu djelatnost, ili organizovani servis za kontrolu vatrogasnih aparata u okviru organa javne uprave ili javne ustanove koji imaju odgovarajuću tehničku opremu, poslovni prostor i stručne radnike i koji za to dobije odobrenje od nadležnih organa Brčko distrikta BiH ili ima odobrenje od nadležnih entitetskih ili kantonalnih organa.

(3) Pravilnik o ispunjavanju uslova za vršenje kontrole ispravnosti vatrogasnih aparata za gašenje početnih požara donosi šef odjeljenja nadležnog za poslove zaštite od požara.

(4) U periodičnom razmaku od jedne godine vrši se:

- a) kontrola ispravnosti vatrogasnih aparata za gašenje početnih požara;
- b) kontrola ispravnosti hidrantske mreže;
- c) mjerenje pritiska hidrantske mreže;
- d) kontrola opremljenosti i kompletiranosti hidrantskih ormara.“

Iza stava 5 ovog člana dodaju se novi stavovi 6, 7 i 8 koji glase:

„(6) Evidencija iz stava 5 ovog člana sadrži:

- a) knjigu evidencije kontrolisanih aparata;
- b) zapisnik o kontroli aparata;
- c) zapisnik o mjerenju pritiska i kontroli kompletiranosti hidrantske mreže i
- d) karticu ili odgovarajuću naljepnicu s potrebnim podacima koja se postavlja neposredno na aparat.

(7) Ispitivanje hidrantske mreže može da vrši i drugo pravno lice i preduzetnik koji je registrovan za tu djelatnost ili servis za kontrolu hidrantskih instalacija koji se nalazi u organu javne uprave, a ima odgovarajuću opremu i zaposlene radnike s najmanje srednjom stručnom spremom tehničke struke i položenim stručnim ispitom za rad na poslovima zaštite od požara ili ispitom za profesionalnog vatrogasca.

(8) Ispitivanje hidrantske mreže može da vrši pravno lice ili preduzeće za svoje potrebe, pod uslovom da ima odgovarajuću opremu i zaposlene radnike s najmanje srednjom stručnom spremom i položenim stručnim ispitom za rad na poslovima zaštite od požara.“

Član 12

U novom članu 29 stavu 1 riječi: „najmanje jednom u roku od 6 mjeseci“ zamjenjuju se riječima: „najmanje jednom u roku od jedne godine“.

Član 13

U novom članu 30 stav 3 mijenja se i glasi:

„(3) Do donošenja odluke iz člana 8 stava 3 ovog zakona pravno lice i preduzetnik, organ javne uprave Brčko distrikta BiH, pravosuđe Brčko distrikta BiH, Pravobranilaštvo Brčko distrikta BiH i Policija Brčko distrikta BiH dužni su da imenuju odgovorno lice iz stava 1 ovog člana, koje mora da ima najmanje četvrti stepen stručne spreme.“

Stav 5 ovog člana se briše.

Član 14

Novi član 31 mijenja se i glasi:

„Član 31 (Opći akt o zaštiti od požara)

Pravna i fizička lica iz člana 9 stava 5 ovog zakona dužna su da dostave opći akt o zaštiti od požara inspektorima za zaštitu od požara.“

Član 15

U novom članu 34 iza riječi: „požara“ na kraju teksta, dodaju se riječi: „i Inspektorat“.

Član 16

U novom članu 35 stav 5 mijenja se i glasi:

„(5) Teritorijalna vatrogasna jedinica ostvaruje i zadatke jedinice civilne zaštite u skladu sa zakonom kojim se propisuje zaštita i spašavanje ljudi i materijalnih dobara od prirodnih i drugih nesreća.“

Član 17

Novi član 39 mijenja se i glasi:

„Član 39 (Nadzor nad radom vatrogasnih jedinica)

Inspektor zaštite od požara vrši inspekcijski nadzor nad radom vatrogasne jedinice u pogledu:

- a) spremnosti i tehničke opremljenosti jedinice;
- b) stručnog osposobljavanja;
- c) usavršavanja vatrogasaca;
- d) sposobnosti vatrogasne jedinice za gašenje požara.“

Član 18

U novom članu 41 stav 2 mijenja se i glasi:

„(2) Inspektor za zaštitu od požara daje saglasnost na plan i program iz stava 1 ovog člana i vrši nadzor nad njegovim izvršavanjem.“

Član 19

U novom članu 42 stav 4 se briše.

Član 20

U novom članu 45 stav 1 tačka b) se briše, a tačka c) postaje tačka b).

Član 21

U novom članu 47 u stavu 4 riječi: „Vlada Brčko distrikta BiH“ zamjenjuju se riječima: „šef odjeljenja nadležnog za poslove zaštite od požara“.

Član 22

Iza novog člana 49 dodaje se novi član 50 koji glasi:

„Član 50 (Radni staž s uvećanim trajanjem)

(1) Profesionalnom vatrogascu i rukovodiocu akcije gašenja požara svakih efektivno provedenih 12 mjeseci na poslovima i zadacima računa se kao 15 mjeseci staža osiguranja.

(2) Radna mjesta na kojima se vrijeme provedeno na poslovima i zadacima iz stava 1 ovog člana računa s uvećanim trajanjem, s nazivom radnog mjesta i vremenom uvećanja utvrđuje Vlada Brčko distrikta BiH, na prijedlog šefa odjeljenja nadležnog za poslove zaštite od požara.“

Član 23

U članu 51 stav 2 mijenja se i glasi:

„(2) Šef odjeljenja nadležnog za poslove zaštite od požara daje saglasnost na odluku o osnivanju industrijske vatrogasne jedinice.

Član 24

U članu 52 stav 2 mijenja se i glasi:

„(2) Šef odjeljenja nadležnog za poslove zaštite od požara daje saglasnost na sporazum o osnivanju zajedničke vatrogasne jedinice.“

Član 25

Član 55 mijenja se i glasi:

„Član 55 (Nadzor nad radom industrijske vatrogasne jedinice)

Inspektor za zaštitu od požara vrši nadzor nad radom industrijske vatrogasne jedinice u pogledu:

- a) spremnosti jedinice,
- b) tehničke opremljenosti jedinice,
- c) stručnog osposobljavanja industrijskih vatrogasaca,
- d) usavršavanja industrijskih vatrogasaca,
- e) sposobnosti jedinice za gašenje požara.“

Član 26

U članu 61 stavu 1 tačka b) se briše, a tačka c) postaje tačka b).

Član 27

U članu 63 u stavu 4 riječi: „Vlada Brčko distrikta BiH“ zamjenjuju se riječima: „šef odjeljenja nadležnog za poslove zaštite od požara“.

Član 28

U članu 66 stavu 1 brojevi: „46 i 47“ zamjenjuju se brojevima: „45 i 46“.

Član 29

U članu 71 stavu 2 riječi: „Službu osmatranja i obavještanja“ zamjenjuju se riječima: „Centar–112“.

Član 30

U članu 73 stav 3 mijenja se i glasi:

„(3) U gašenju požara širih razmjera i spašavanju ljudi i materijalnih dobara može se angažovati i jedinica civilne zaštite formirana i osposobljena za gašenje požara.“

U stavu 5 ovog člana riječ: „gradonačelnika“ zamjenjuje se riječima: „šefa odjeljenja nadležnog za poslove zaštite od požara“.

Član 31

U članu 74 stav 3 se briše, a stav 4 postaje stav 3.

U novom stavu 3 ovog člana riječi: „i inspektor za zaštitu od požara“ se brišu.

Član 32

U nazivu člana 75 riječi: „inspektor za zaštitu od požara“ se brišu.

U članu 75 stavu 1 riječi: „kao i inspektor za zaštitu od požara Brčko distrikta BiH“ se brišu.

Član 33

U članu 80 stav 1 mijenja se i glasi:

„(1) Inspeksijski nadzor nad provođenjem mjera zaštite od požara propisanih ovim zakonom i planom zaštite od požara, kao i nad provođenjem propisa o tehničkim normativima u pogledu zaštite od požara, vrši inspektor za zaštitu od požara.“

Član 34

U članu 82 stavu 1 tačka m) se briše, a tačka n) postaje tačka m).

Član 35

U članu 84 broj: „28“ zamjenjuje se brojem: „27“.

Član 36

U članu 87 stavu 2 i članu 88 stavu 1 riječi: „zakonom o civilnoj zaštiti“ zamjenjuju se riječima: „zakonom kojim se propisuje zaštita i spašavanje ljudi i materijalnih dobara od prirodnih i drugih nesreća.

Član 37

Član 92 se briše, a član 93 postaje član 92.

Član 38

Novi član 92 mijenja se i glasi:

„Član 92

(1) Novčanom kaznom u iznosu od 500,00 do 5.000,00 KM kaznit će se za prekršaj preduzeće i drugo pravno lice ako:

- a) ne utvrdi propisanu organizaciju u skladu s članom 9 ovog zakona;
- b) pri izvođenju radova na objektima ne preduzme potrebne mjere za sprečavanje nastajanja i širenja požara i ne osigura potrebna sredstva i opremu za gašenje požara (član 13 stav 2 ovog zakona);
- c) upotrebljava neispravne ili nepravilno postavljene instalacije, uređaje, kao i dimovode i požarišta ili nema dokumentaciju o održavanju (član 20 ovog zakona);
- d) drži ili uskladištava lako zapaljive materije suprotno odredbi člana 22 stava 1 ili koristi otvorenu vatru suprotno odredbama člana 22 stava 2 ovog zakona;
- e) ne drži u pripravnosti uređaje, opremu i sredstva za gašenje na pristupačnom mjestu shodno članu 24 ovog zakona;
- f) ne osigura posebne mjere shodno članu 25 ovog zakona;
- g) ne osigura vatrogasno dežurstvo shodno članu 26 ovog zakona;
- h) ne uplaćuje obaveze iz člana 91 ovog zakona;
- i) ne osigura redovnu kontrolu i ispitivanje ručnih i prevoznih vatrogasnih aparata za gašenje početnih požara i hidrantske mreže (član 28 ovog zakona);
- j) ne osigura redovno ispitivanje ispravnosti i funkcionalnosti uređaja i sistema u skladu s članom 29 ovog zakona;
- k) stavi u promet uređaje, opremu i sredstva suprotno odredbama člana 27 ovog zakona ili ako ne izvrši naređenje o zabrani upotrebe opreme iz člana 85 ovog zakona;
- l) se ponaša suprotno odredbi člana 30 ovog zakona;
- m) ne izvrši obračunavanje i upoznavanje radnika s opasnostima od požara i praktičnom upotrebom opreme i sredstava za gašenje požara (član 32 ovog zakona);
- n) ne donese plan i provođenje ili ne izvrši provjeru stručnog znanja vatrogasaca (članovi 41 i 57 ovog zakona);
- o) vrši radnje suprotno članu 44 i članu 60 ovog zakona;
- p) po saznanju za požar ne postupi u skladu s članom 71 stavom 3 ovog zakona;
- r) sprečava ili ometa izvršenja rukovodioca akcije gašenja požara iz člana 75 ili postupi suprotno odredbama člana 76 ovog zakona;
- s) određenom roku ne izvrši naložene mjere zaštite od požara, a nastavi s korištenjem objekta, ne izvjesti pismeno inspektora za zaštitu od požara o izvršenju njegovog rješenja u predviđenom roku (član 83, 84, 85 i 86 ovog zakona).

(2) Za prekršaj iz stava 1 ovog člana kaznit će se odgovorno lice u preduzeću ili drugom pravnom licu, organu javne uprave Brčko distrikta Bosne i Hercegovine, organu pravosuđa Brčko distrikta

BiH, Pravobranilaštvu Brčko distrikta BiH i Policiji Brčko distrikta BiH, novčanom kaznom od 150,00 KM do 1.500,00 KM.“

Član 39

Iza člana 92 dodaje se novi član 93 koji glasi:

„Član 93

„Za prekršaj iz člana 92 stava 1 tački a), b), c), d), e), f), g), h), i), j), k), l), m), n) i s) ovog zakona kaznit će se preduzetnik novčanom kaznom u iznosu od 100,00 do 1.000,00 KM.“

Član 40

Član 94 ovog zakona mijenja se i glasi:

„Član 94

Novčanom kaznom od 50,00 do 100,00 KM kaznit će se za prekršaj građanin ako:

- a) upotrebljava neispravne ili nepravilno postavljene instalacije, dimovode ili ložišta (član 20 stav 2 ovog zakona);
- b) postupi suprotno odredbama člana 21 ovog zakona;
- c) drži ili uskladištava lako zapaljive materije suprotno odredbi člana 22 stava 1 ili koristi otvorenu vatru suprotno odredbi člana 22 stava 2 ovog zakona;
- d) ne preduzme mjere propisane ili naložene shodno članu 24 ovog zakona;
- e) ne osigura redovnu kontrolu i ispitivanje vatrogasnih aparata za gašenje početnih požara u skladu s članom 28 ovog zakona;
- f) postupi suprotno odredbi člana 71 stavova 1 i 2 ovog zakona;
- g) sprečava ili ometa izvršenje rukovodioca akcije gašenja požara iz člana 75 ili postupi suprotno odredbama člana 76 ovog zakona;
- h) u određenom roku ne izvrši naložene mjere zaštite od požara, a nastavi s korištenjem objekta, ne izvijesti pismeno inspektora za zaštitu od požara o izvršenju njegovog rješenja u predviđenom roku (članovi 83, 84, 85 i 86 ovog zakona).“

Član 41

Član 95 mijenja se i glasi:

„Član 95

(Pravilnik o mjerama zaštite od požara šuma i usjeva)

Šef Odjeljenja za poljoprivredu, šumarstvo i vodoprivredu donosi pravilnik o mjerama zaštite od požara šuma i usjeva.“

Član 42

U članu 96 stavu 2 riječi: „Vlada Brčko distrikta BiH“ zamjenjuju se riječima: „šef odjeljenja nadležnog za poslove zaštite od požara“.

Član 43

U članu 97 riječi: „gradonačelnik Brčko distrikta BiH“ zamjenjuju se riječima: „šef odjeljenja nadležnog za poslove zaštite od požara“.

Član 44

U članu 98 stavu 1 broj: „46“ zamjenjuje se brojem: „45“.

Iza stava 1 ovog člana dodaje se novi stav 2 koji glasi:

„Odredbe ovog zakona koje se odnose na radni staž s uvećanim trajanjem primjenjuju se od 1. januara 2012. godine.“

Član 45

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH“.

Broj: 01-02-409/11

Brčko, 15. juna 2011. godine

PREDSJEDNIK
SKUPŠTINE BRČKO DISTRIKTA BiH

Esad Atić